

M069: Ezzos Cantilena de miraculis Christi

- 0,1 nû wile ich iu hêren .
0,2 eine wâr rede vore tuon .
0,3 von dem aneenge .
0,4 von allem mankünne
0,5 von dem wîstuome alse manicvalt
0,6 der an den buochen stêt gezalt
0,7 ûzer genesi unde ûzer libro regum
0,8 dirre werlte . al ze den êren .
0,9 lux in tenebris .
0,10 daz sament uns ist .
0,11 der uns sîn lieht gibet .
0,12 neheiner untriuwen er ne pfliget .
0,13 in principio erat uerbum
0,14 daz ist wâre gotes sun
0,15 von eineme worte er bekam .
0,16 dirre werlte . al ze den genâden .
0,17 wâre got ich loben dich
0,18 dîn aneenge jihen ich .
0,19 daz aneenge bist dû trehtîn eine .
0,20 ich ne jihe in anderz . nehein .
0,21 der got der erde unde des himeles .
0,22 wâges unde luftes
0,23 unde des in den viern ist .
0,24 ligentes unde lebentes .
0,25 daz geschüefe . dû allez eine
0,26 dû ne bedorftest helfe dâr zuo .
0,27 ich wile dich ze aneenge haben .
0,28 in worten unde in werken .
0,29 got dû geschüefe al daz dâr ist
0,30 âne dich ne ist nieht
0,31 ze allerjungeste geschüefe dû den man .
0,32 nâch dînem bilede getân .
0,33 nâch dîner getæte .
0,34 daz er gewalt habete .
0,35 dû bliese ime dînen geist in .
0,36 daz er êwic mahte sîn .
0,37 noch er ne vorhte ime den tôt .
0,38 ob er gehielte . dîn gebot .

0,39 ze allen êren geschüefe dû den man .
0,40 dû wisses wole sînen val .
0,41 wie der man getæte .
0,42 des gehügen wir leider nôte
0,43 durch des tiuveles rât .
0,44 wie schier er ellende wart .
0,45 vile harte gie diu sîn schult
0,46 über alle sîn afterkunft .
0,47 sie wurden alle gezalt
0,48 in des tiuveles gewalt .
0,49 vile michel was diu unser nôt .
0,50 dô begonde rîchesen der tôt .
0,51 der helle wuohs der ire gewin .
0,52 mankünne al daz vuor dâr in .
0,53 dô sich Adâm dô beviel
0,54 dô was naht unde vinsten .
0,55 dô schinen her in werelte .
0,56 die sternen bî ire zîten .
0,57 die vile lützel liehtes bâren .
0,58 sô berhte sô sie wâren .
0,59 wande sie beschatewete
0,60 diu nebelvinster naht .
0,61 diu von deme tiuvele kam .
0,62 in des gewalt wir wâren .
0,63 unz uns erschein der gotes sun .
0,64 wâre sunne von den himelen .
0,65 der sternen aller iegelich .
0,66 der teilet uns daz sîn lieht .
0,67 sîn lieht daz gap uns Abel
0,68 daz wir durch reht ersterben .
0,69 dô lêrte uns Enoch .
0,70 daz unseriu werc sîn al in gote .
0,71 ûzer der arke gap uns Nôê
0,72 ze himele reht gedinge .
0,73 dô lêrte uns Abraham .
0,74 daz wir gote sîn gehôrsam .
0,75 der vile guote Dâvît .
0,76 daz wir wider übele sîn genædic